

Ciet Vaiz Doxdaemj Doxdax Sanhgyangh:


Buekdaemj Haenqrem Ciengz-mienh Hoenghghwd Yinx Vunz

精彩刺激惊心动魄的三江侗族斗牛节

□ Yangz Yiboh ingj Sinhyungz hoiz



▲ Vaiz doxdaemj haenq lai, vunzlai doxdaemx yawj.



▲ Yawj gwnz giuzndojfwn, gyoengqvunz caenx ndaet raeuh.



▲ Vaizvuengz cing hauej ciengz, duzduz yiengh akkaenh.



▲ Baengzyoux guekrog daengz, dou simmaengx gingq laeuj.



▲ Daemj mbouj faen sawhingz, doxdingj beij rengz ak.



▲ Sau Duncuz couxhek, cenj laeujget gingq mwngz.



▲ Caemh gwn ngaiz bak ranz, diegdangz nauhyied raeuh.

Moix bi youq aen geiqciet seizcin caeuq seizcou, vunz Duncuz Sanhgyangh Duncuz Swciyen cungj hoengh banh vaiz doxdaemj doxdax hozdung, yinx vunz dangdieg caeuq hekyouz bae humx yawj, nauhyied raixcaix.

Vunz Duncuz gyaex aen hozdung vaiz doxdaemj doxdax, dwg aen hozdung conzdungj Duncuz, gaenq miz geij bak bi lizsij. Riuz naeuz, ciuhgeq vunzraeuz lij caengz rox ciemzgyaj ndaemnaz, doeklaeng miz song duz vaizdaeg buet hauej ndaw nazgyaj doxdaemj, caij gij go-gyaj laemx vang laemx raeuh vaih bae haujlai, bouxcawj gaiqnaz mbouj miz banhlap, cijndei daj gij go-gyaj haemq deihaenx ciemz aeu mbangj go-gyaj bae dieg duzvaiz caij vaih de ndaem, doeklaeng gaiq naz neix ndaej fungsou lo. Vunzraeuz couh baenzneix rox le ciemzgyaj ndaemnaz. Vih geiqniemh hangh saeh hung ndaemnaz neix, gyoengqvunz cing song duz vaizdaeg daeuj doxdaemj, bi dem bi couh baenz le fungsug sibgvenq.

“Ciet vaiz doxdaemj” dwg youq moix bi liggaueq ndwengeih ndwensam roxaeuz ndwenbet ndwengouj roeb ngoenz “haih” cix banh. Diegciengz vaiz doxdaemj ciengzciengz laeb youq ndaw ruqda haemq gvangq henz mbanj, geij bi gonq yienhsingz lij cienmonz guh le aen ciengzdoxdax vaiz doxdaemj ndeu. Ngoenzciet gaxgonq, gyoengq bouxcou couh boq aenvenz bae aen mbanj wnq ra iu ndei doxdax doiqfueng, guh ndei gak cungj hong bwh. Youq henz aenriengh duz vaizvuengz yaek camgya doxdax haenx, vunzmbanj roq gyonglaz boq venz cit bauq, nauh baenz ngoenz baenz hwnz. Banhaet ngoenzciet, cuengq sam sing bauqdiet le, bouxcawj cing “vaizvuengz” youq

ndaw sing gyonglaz caeuq sing venz byaij hauej ndaw ciengz doxdax. Seizneix, caenh raen baenz doih baenz doih vunz ndaw fwngz gam gvegim, fagfouj, yaengx gak cungj geiz lai saek, doxriengz dwk byaij hauej ndaw ciengz caemhcai hopngomx byaij sam hop, suengq dwg “yizsi hauej ciengz”, caemh heuhguh “caij ciengz”. Riengzdwk, gak aen doih dingdingh cing duz “vaizvuengz” bonjfaenh, yaengx gaiq bogfeiz, cajdeq doxdax. Sing bauqdiet baez yiengj, gyoengqde couh bau gaiq bogfeiz okbae, song duz vaiz camgya doxdaemj haenx couh daj song gyauej yat bongh okbae, song aen gyauejvaiz “dung” sing hung ndeu couh doxdaemj hwnjdauej, mbangseiz duz ndengj duz doenq, mbangseiz doxdingj daemx youq mbouj faenhai. Gyoengq bouxyawj caemh riengzdwk hemq mbouj dingz, daengx ciengz haenqghwd nauhyied. Ginggvaq buekdaemj geij mbat le, duz hingz ndaej longz fan baengznding ndeu youz bouxcawj cing dwk byaij hop he le byaij okbae. Duz saw haenx couh camj di lo, gij geiz aen doih de deng gyoengq dahsau doiqfueng ciengjdued bae liux. Gvaq geij ngoenz le, gyoengq dahsau soengq gij geiz haenx bae hawj mbiengj saw, ndaej daengz gyoengq daegmbauq aen mbanj neix dakdaih, buenx gyoengq dahsau ciengq golaux, yaek doxbiek seiz lij boq venz diuq foux soengq ok mbanj, soengq laex rouh geiz ma.

“Ciet vaiz doxdaemj” ciengz-mienh hungloet, ndei yawj mizyinx, haenqrem hoenghghwd, hawj vunzlai dangdieg yawj mbouj rox mbwq, caemh yinx gyoengq hekyouz ndaw guek rog guek bae yawjngonz, doengzseiz lij ndaej yawjngonz gij fungsug fungcingz dangdieg dem, caemh sim'angq raixcaix.



▲ Bineix sien buetdeuz, bimoq dauq daeuj beij.